

22 阿母的笑容

有人講，蒙娜麗莎的文(bûn)文仔笑，迷人閣蓋(kài)高尚。毋知逐家意見如何？啊若我的看法是，阮阿母的笑容是通世界上蓋(kài)美麗的。阮阿母性地好閣有度量，毋管人按怎共(kā)偏(phinn)，伊永遠笑笑仔，攏袂受氣。厝邊隔壁攏講阮阿母就親像醉彌勒全款，足有量的。阮阿母人非常樂觀，若像攏毋知影煩惱是啥物？閣較濟的工課、閣較困難的問題，伊一定是歡歡喜喜來共(kā)看待。伊定定咧講：「食苦若食補。做人啊！毋通怨天怨地。艱苦嘛是一世人，歡喜嘛是一世人，笑笑仔較好過日啦！」

有當(tang)時仔看著我，因為隔日欲考試，煩惱甲憂頭結面。這個時陣，伊就叫我起去眠床反死狗仔栽。阿母講：「共頭殼內的物件搵搵(tshik-tshik)咧，按呢記較會牢。」這個時陣，我就會peh起去眠床頂，反予阿母看，阿母就笑甲軟腰，目睷沙微(sa-bui)仔沙微。

阿母看逐項代誌攏足有趣味，伊拄著人，毋管是熟似抑是生份，一定是笑面相款待。阮阿爸講：「當初，就是因為佢意阿母的笑容，毋才會拚命逐(jiok/jik/lip)來做某。」聽著阿爸講按呢，阿母是面仔紅紅，笑甲若玫瑰花咧開全款。阮厝內面阿母若有佇咧，阮就有笑容通好看。

我的成績，一向是普通普通，有當(tang)時仔吊車尾，家己看著嘛歹勢。毋過，阿母攏毋捌因為我考糶(bái)，就予我食膨餅(phòng-piánn)。伊講冊認真讀就好矣，讀無嘛無要緊，人講：「一枝草一點露，一人勢(gâu)一步，天公總是會予咱路行。」雖然阿母按呢講，毋過我知影，我若是有好成績，伊一定會足歡喜的。所以我偷改分數，得著第七名。彼工轉去，共阿母報告好消息。真奇怪，阿母無笑容，顛倒予我食膨餅。原來老師早就發現矣，先我一步，敲電話予阿母。我只有頭犁犁，老實承認毋著。阿母干焦(kan-na)輕輕仔講：「知影毋著，後改就毋通按呢。」我才徹底覺悟講人愛跣踏實地才是正路，靠家己拍拚得著成功，阿母才有笑容。